

In memoriam Jorge Guastavino

ORANJESTAD - Ora cu e noticia a yega na nos diamars dia 8 di mei 2012, cu Sr. Jorge Guastavino a bay sosega den Señor, na e edad respetabel di 92 aña, nos pensamentonan a bay bek basta leu den historia di YMCA cu indiscutiblemente ta carga e marca di Don Jorge.

Ta un hecho cu historia di YMCA na Aruba ta mara pa un gran parti na accion-, intervencion-, acontecimiento-, guia y liña di maneho di Sr. Jorge Guastavino, cu a nace na Santiago de Chile, dia 10 di november 1919 y a biba na Aruba for di aña 1967. Pa mas cu 30 aña YMCA a wordo dirigi pa Secretario General Jorge Guastavino. Ken no conoce Uncle George? Ken no a yega di haya un "heart to heart" talk cu Mr. Guastavino?

Ora di organisa actividadnan pa recauda fondo pa YMCA, nos ta corda con Jorge tabata esforsa su mes pa convence publico en general y comerciantenan en particular di e causa sagrado di duna na trabou pa hobennan y esnan necesita. E causa humanitario di trabou di YMCA y su base Christian, tabata Jorge su inspiracion den bida. Ora bo tin speransa y fe, ningun tarea ta imposibel pa bo cumpli cune!

Pa mayoria di miembronan di directiva cu a sirbi durante e periodo cu Sr. Guastavino tabata Secretario General, e recuerdo mas grandi cu nan a keda cune ta: "Jorge taught us by example, his love for his fellow-man and for the work he was doing".

E amor pa bo prohimo, e amor pa nos comunidad, e amor y dedicacion na crea oportunidadnan sano pa hoben y adolescente riba diferente tereno te awe ta e fundeshi riba cual YMCA ta sigui ehersce su tarea. Pa e trabou incansabel, pa e bon ehempel cu Jorge Guastavino a duna directiva, staf, personal, boluntario y hobennan durante tanto aña, a dedica e centro nobo di YMCA na Dakota na dje na aña 2006: "Jorge Guastavino YMCA Center".

Den nos curason y den curason di hopi, cu awe ta lidernan importante den nos comunidad, nos ta sigur cu Don Jorge Guastavino lo keda cu un luga special. Su memoria lo sigui inspira pa cumpli cu necesidadnan sano y cristian di hobennan y grandinan necesita den nos comunidad.

Uncle George, Don Jorge, Mr. Guastavino sosega na paz, bo trabou ta cumpli; bo a lucha un lucha noble y bo principio di vida a laga su rasgonan atras. "You did it George, without a cent, but with hope and prayer". Pueblo di Aruba y en particular YMCA of Aruba ta gradicido na Creador pa tur locual Jorge a haci pa nos durante su bida: Thank you George! ☐